

### उच्चतम न्यायालय—आधार

उच्चतम न्यायालय ह आने—आने सामाजिक कल्याणकारी योजना मनके फायदा ले बर आधार ल जरूरी बनाय के केन्द्र सरकार के अधिसूचना के खिलाफ अंतरिम आदेस देय ले मना कर देहे। न्यायमूर्ति ए.एम. खानविल्कर अउ न्यायमूर्ति नवीन सिन्हा के अवकाश पीठ ह किहीन कि सिरिफ ए आशंका म अंतरिम आदेस पारित नइ करे जा सकय कि सरकार आधार नइ होय के सेती लोगन मन ल आने—आने सामाजिक कल्याणकारी योजना मनके फायदा ले दूरिहा रख सकत हे।

उच्चतम न्यायालय ह सुनवाई बर अवइया तारीख सात जुलाई तय करे हे।

### किसान आत्महत्या—मामला

छत्तीसगढ़ म पाछु करीबन एक पखवाड़ा के दउरान करीबन छै झिन किसान मनके आत्महत्या करे के मामला आगू आय हे। ए बात ल लेके मुख्यमंत्री डॉक्टर रमन सिंह ह किहीन कि आत्महत्या करना गलत आदत आय अउ ए कोनों भी परेसानी के समाधान नो हय। ओमन किहीन कि कोनों भी सेती किसान आत्महत्या करत हे, त ओमन एला गलत मानथे।

मुख्यमंत्री ह किहीन कि किसान मनके आत्महत्या ल लेके जउन रिपोर्ट आवत हे ओमा आने—आने तथ्य हावय। ओमन किहीन कि कोनों पारिवारिक झगड़ा के सेती आत्महत्या करत हे, त यहू गलत हावय। डॉक्टर सिंह ह किसान मन ले आग्रह करे हे कि ए किसम के भावनात्मक बात ले बचना चाही।

इही बीच, किसान मनके आत्महत्या के मामला लेके प्रदेश के कृषि मंत्री बृजमोहन अग्रवाल ह किहीन हे कि पारिवारिक मामला के सेती करे गे आत्महत्या ल विपक्षी दल दूसरा रूप देय के कोसिस करत हे।

उहें, कांग्रेस के नेता मन ह आत्महत्या करइया किसान मनके परिवार वाले मन ले मिले के फइसला करे हे। प्रदेश कांग्रेस अध्यक्ष भूपेश बघेल के अगुवई म पार्टी के बड़का नेता मनके टीम आज रायपुर ले रवाना होय हे। कांग्रेस के ए दल दुर्ग, धमतरी अउ महासमुंद जिला म जाही।

### दीक्षांत समारोह

रायपुर के तीर स्थित राज्य पुलिस अकादमी म कम्पोजिट इन सर्विस ट्रेनिंग सेन्टर के स्थापना करे जाही। ए घोसना मुख्यमंत्री डॉक्टर रमन सिंह ह आज राजधानी रायपुर के तीर छत्तीसगढ़ राज्य पुलिस अकादमी चंदखुरी म राज्य पुलिस सेवा संवर्ग के प्रशिक्षित उप पुलिस अधीक्षक के दीक्षांत समारोह ल संबोधित करत खानी किहीन। ए मउका म मुख्यमंत्री ह परेड के सलामी लीन। मुख्यमंत्री ह किहीन कि समाज, राज्य अउ देश के आंतरिक सुरक्षा म पुलिस बल के भूमिका बिसेस रहिथे।

अकादमी के छठवां सत्र म अठारह प्रशिक्षु उप पुलिस अधीक्षक के प्रशिक्षण अप्रैल दू हजार सोला म सुरु होय रिहीस। एखर सिराय के बाद आज दीक्षांत परेड राखे गे रिहीस।

### दक्षिण कोरिया—कंपनी

दक्षिण कोरिया के एक ठिन कंपनी ह नवा रायपुर समेत छत्तीसगढ़ के सहरी क्षेत्र मन म कमती लागत के आवासीय परियोजना म पूंजी लगाय बर अपन रूचि देखावत हे। सियोल ले आए हानवाहा कंपनी के प्रतिनिधि मंडल ह आज रायपुर म मुख्यमंत्री डॉक्टर रमन सिंह ले मुलाकात करीन। कंपनी के अधिकारी मन ह किहीन कि ओमन पब्लिक—प्राइवेट पार्टनरशिप मॉडल म घलो ए काम कर सकत हे। संगेसंग मुख्यमंत्री ल बतईन कि नवा रायपुर म टाउनसिप विकास समेत राजनांदगांव म रक्षा उत्पादन उद्योग लगाय के इच्छा जताय हे।

मुख्यमंत्री ह किहीन कि छत्तीसगढ़ म हाउसिंग सेक्टर के संगेसंग सौर ऊर्जा, रक्षा उत्पादन, इलेक्ट्रानिक्स उद्योग जइसन क्षेत्र मन म घलो निवेश के बने संभावना हे।

## डीएफपी-कार्यक्रम

केन्द्र सरकार के जनकल्याणकारी योजना ले गांव वाले मन ल अवगत कराय बर भारत सरकार के क्षेत्रीय प्रचार निदेशालय प्रदेश म आने-आने कारीकरम करत हे। इही कड़ी म डी.एफ.पी. के जगदलपुर इकाई ह आदिवासी बहुल विकासखंड-बकावंड के ग्राम पंचायत-सौतपुर अउ पोटियावंड म दू दिवसीय बिसेस जागरूकता के संग प्रचार कारीकरम आयोजित करीस।

ए स्पेसल आउटरीच प्रोग्राम म जिला अउ जनपद पंचायत के आने-आने विभाग ले जुड़के गांव वाले मन ल स्वच्छ भारत मिशन, बेटी बचाओ-बेटी पढ़ाओ, जनधन, फसल बीमा, कौशल भारत-कुशल भारत, उज्ज्वला योजना समेत केन्द्र सरकार के आने-आने योजना अउ कारीकरम के जानकारी दे गीस।

## मौसम

राज्य के कोनों-कोनों जघा म अवइया दू दिन के दउरान भारी बरसा होय के चेतावनी दे गेहे। मौसम विभाग के मुताबिक उत्तरी ओड़िशा अउ झारखंड के तीर-तखार म चक्रवात बने हे। एखर संगेसंग पश्चिम राजस्थान ले बंगाल के खाड़ी तक एक ठिन द्रोणिका घलो बने हावय। एखर सेती प्रदेश के ज्यादातर जघा मन म अवइया पांच दिन तक गरज चमक के संग सिटिर-साटर पानी गिरे के संभावना हावय।

## संक्षिप्त समाचार

- जांजगीर-चांपा जिला के मालखरौदा इलाका म स्थित पोताचरौदी गांव के तीर एक ठिन गाड़ी अउ फटफटी के टक्कर म फटफटी म बइठे मनखे के मउकाच म मउत हगे। घटना के बाद गुस्साए मनखे मन चक्काजाम करीन अउ गाड़ी म आगी लगा दीन।
- नसबंदी कांड म पुलिस ह दूसरइया आरोपी राकेश खरे ल गिरफ्तार कर लेहे। एला बिलासपुर के कोनी इलाका ले गिरफ्तार करे गेहे। आज ए आरोपी ल कोर्ड म पेस करे गीस। नसबंदी कांड म बछर दू हजार चौदा म बिलासपुर के तीर पेंडारी अउ पेंड्रा म सरकारी सिविर म ऑपरेशन के बाद तेरा झिन माईलोगिन के मउत हगे रिहीस।
- कोंडागांव जिला म बोरगांव आईटीआई चौक के तीर एक ठिन गाड़ी ले पुलिस ह छिहत्तर किलो गांजा जब्त करके चार झिन आरोपी ल गिरफ्तार करे हे। जब्त गांजा के कीमत करीबन चार लाख रुपिया बताय जावत हे।